



Le strie sun Latemar

Voi no saede olache l'è l Pabòler: l'è l prum contadin todesch passà l Latemàr. L'era una da Pera aló masciara, i ge dijea Maria Todescía. E la vedea che ste masciare dò cena le vegnià fora e le se sentaa enlongia fregolar a far vila, e canche ela l'aea fenì la sin jìa te stua e cheste no le jìa it'. E sora mìngol la jìa fora a veder e no le era più e no le vegnià fin mesanot. E la ge conta a n famei, sta roba:

«No sé» la disc, «che jent che l'è chista».

«Gio» l disc, «sospete che sie strie».

«Ma sospetar» la disc, «ge volessa ben esser seures».

«Speta» l disc, «che sta sera me scone sot fregolar».

L'è se n jit ló, e enfati sta una la va fora a lavar jù e, e dò la sin va te stua e le ven fora: le met sora fregolar na man e le tol jù n picol bóssol, n picol còcol, e le se onc. E una dò l'otra le ponta via e su su per ciamin. E l ge disc a sta masciara da Pera:

«Veiste mo e! é ben dit che l'è strie, le é dute pontade via su per ciamin. Olà jirale pa? Peta» l disc, «che doman canche le se à ont ele me onje ence gio, fosc son bon de ge jir dò».

Enfati l se à ont, e l'è ruà, l'è ruà sul Latemàr te n beliscim ciastel. E i sonaa, i balaa, e i magna e i beea, ma dut ensous. E i ge à prejentà ence a chest, e l disc:

«Zenza sal no l'è saor, zenza Dio no l'è signor».

L'è stat dut n scrèvet, e l'è restà soul e solient su la ponta de chel crep.

Giovanni Bernard Cechinòl, Pera 1977. Intervista di Cesare Poppi, Pera 4. Arch. ICL, SCRcd016.
Anche in *Dolomites encantèdes. Racconti popolari dalla Valle di Fassa*, Istitut Cultural Ladin 2002.